

30.01.2015.



Članovi Vlade Bosansko-podrinjskog kantona Goražde, predvođeni premijerom Emirom Okovićem, danas su posjetili goraždanske privredne subjekte „Bekto Precisa“, „Goražde Technology“, UNIS „Ginex“, „Pobjeda Rudet“ i „TAG“.

Na sastancima sa predstavnicima menadžmenta, razgovarano je o trenutnim aktivnostima i planovima ovih privrednih subjekata u narednom periodu, te mogućnostima podrške Vlade u njihovoj realizaciji.

– Ovim putem želim da izrazim zadovoljstvo i čestitam privrednicima na uspješnim rezultatima koje su postigli u svom poslovanju. Danas smo bili u prilici da se uvjerimo u stručnost i stepen razvijenosti naših privrednih subjekata i mogu da kažem da smo zaista oduševljeni onim što smo vidjeli. Ova Vlada na ovaj način želi da ostvari uvid u probleme s kojima se privrednici susreću kako bi se održala saradnja kroz koju nastojimo ostvariti zajedničke ciljeve – poručio je premijer Oković.

Podršku goraždanskim privrednicima iskazao je i ministar za privredu Esed Radeljaš.

– Krenuli smo u obilazak privrednih subjekata da vidimo šta je to u čemu mi možemo pomoći kako bi se privreda na prostoru našeg kantona što više razvila. Razgovarali smo o projektima koje može podržati naša Vlada, te projektima za koje je potrebna podrška Vlade FBiH. Mi smo već održali sastanke u Sarajevu sa direktorom Fonda za zaštitu okoliša, kao i u Federalnom ministarstvu poljoprivrede, vodoprivrede i šumarstva, a imamo namjeru posjetiti i Federalno

ministarstvo poduzetništva i obrta kako bismo vidjeli koji su to projekti koji mogu pomoći Goraždu u smislu razvijenosti – istakao je Esed Radeljaš.



Zadovoljstvo zbog posjete Vladi BPK-a iskazali su i predstavnici privrednih subjekata.

– Nama je drago što nas je posjetila Vlada BPK Goražde i želim da kažem da je ovo prva Vlada koja je tako brzo posjetila privredne subjekte. To nam govori da možemo očekivati da će se dosta odraditi za dobrobit naroda i društva u našem kantonu – kazao je Amir Ćoralić, tehnički direktor firme „Bekto Precisa“.

Uz čestitke novoformiranoj Vladi BPK-a Goražde, direktor firme „Pobjeda Technology“ Hasan Tafro izrazio je nadu da će zajednička saradnja Vlade i privrednih subjekata doprinjeti daljem razvoju privrede na području Bosansko-podrinjskog kantona.

– Mislim da je ova posjeta pokazatelj da će ova Vlada voditi računa o privredi i vidim da zaista žele da se uključe u sve naše probleme, s ciljem povećanja broja zaposlenih kao i razvoja naše industrijske zone. Mi smo informisali premijera i ministre o firmama koje egzistiraju na ovom prostoru te našim poslovima i daljim planovima. Premijer i ministri su ovom prilikom obećali da će nam maksimalno pomoći. Nadamo se da će oni to obećanje ispuniti, a mi ćemo se maksimalno zalagati da uposlimo što više radnika i zadržimo ovaj trend suficita na prostoru BPK Goražde“-kazao je direktor firme „Pobjeda Technology“.

Za sljedeću sedmicu najavljene su posjete Vladi i ostalim privrednim subjektima na prostoru Bosansko-podrinjskog kantona Goražde.



Izvor: www.bpkg.gov.ba